

Visoki predstavnik Inzko sastao se sa poljskim ministrom vanjskih poslova Czaputowiczem



Visoki predstavnik Valentin Inzko sastao se danas u Varšavi sa ministrom vanjskih poslova Poljske, Jacekom Czaputowiczem. Visoki predstavnik je informirao ministra Czaputowicza o trenutnoj situaciji u Bosni i Hercegovini, naglasivši oblasti u kojima je neophodno hitno djelovanje domaćih političkih lidera.

„Put BiH prema Evropskoj uniji mora se ubrzati. Na vodstvu ove zemlje je da održi zamah koji je postignut nakon dostavljanja odgovora na upitnik Evropske komisije. Potrebno je djelovati istovremeno na više kolosijeka. Kako bi se postigao napredak, lideri treba da slijede već uvriježenu evropsku praksu: dijalog, kompromis i rješenja koja su svima prihvatljiva.“

Govoreći o trenutnim prioritetima, visoki predstavnik je naglasio da je potrebno postići dogovor u pogledu izborne reforme kako bi se omogućilo neometano provođenje izbora u 2018. godini i implementacija izbornih rezultata: „Međunarodna zajednica želi vidjeti rješenje koje je proizvod domaćih napora. Mi smo spremni pružiti svaku vrstu tehničke i pravne ekspertize kao podršku procesu kojem posreduju EU i SAD“.

Visoki predstavnik je izrazio zahvalnost na dugotrajnom

angažmanu Poljske i njenom doprinosu poslijeratnom razvoju i rekonstrukciji Bosne i Hercegovine, kako kroz strukture Evropske unije, tako i na bilateralnom planu.